

DISSERTATIO INAUGURALIS  
MEDICA

D E

PURPURA ALBA  
MORBO

APUD NOS INCOGNITO

*Quam*

Decreto & Authoritate Gratiofi

*MEDICORUM ORDINIS*

In

Alma Rauracorum Academia

*PRO SUMMIS IN MEDICINA*  
HONORIBUS ET PRIVILEGIIS  
ritè consequendis


*Publicæ & solenni Disquisitioni exponit*

JOH. MICH. BRODHAAG,

Bado - Durlacensis.

Ad diem XI. Maji M D C C XXXIII.

H. L. Q. C.



*Pro Excellent, se. Do  
Vicari.*

B A S I L E Æ,

---

Typis JOHANNIS CONRADI à MECHEL.



# SERENISSIMO PRINCIPI

A C

## DOMINO DOMINO

## DN. CAROLO

### MARCHIONI BADENSI,

E T

HACHBERGENSI, LANDGRAVIO  
SAUSENBERGENSI, COMITI SPAHN-  
HEIMENSI ET EBERSTEINENSI, DYNASTÆ  
IN ROETELN, BADENVVEILER, LAHR  
ET MAHLBERG &c. SACRÆ CÆSAREÆ  
ATQUE REGIÆ CATHOLICÆ MAJESTA-  
TIS, ET CIRCULI SUEVICI RESPECTIVE  
GENERALI CAMPI - MARESCHALLO ET  
SUPREMO REI TORMENTARIÆ  
PRÆFECTO, AC LEGIONIS PEDESTRIS  
LAUD. CIRCULI SUEVICI  
CHILIARCHÆ &c. &c.

*Hoc Artis Asclepiadæe Specimen*

dat, dicat, dedicat, sacrumque facit

subjectissimus

JOH. MICH. BRODHAG.







SERENISSIME PRINCEPS,  
PRINCEPS AC DOMINE  
CLEMENTISSIME!



Uriosè atque sollicitè circumspicere,  
cui has pagellas potissimum offer-  
rem, minimè opus erat; Illicò enim,  
*SERENISSIME PRINCEPS*,  
aurem mihi vellicavit & jucundissi-  
ma memoria eorum, quibus gens  
nostra gavisa est, beneficiorum sub  
*Prædecessoribus Tuis, Gloriosissima Me-*  
*morie*; ex quibus duos numeramus  
Ecclesiarum Antistites, tam ex paternâ, quam maternâ  
lineâ Avos, Brodhagium nempe atque Fechtium; & sua-  
vissima



vissima recordatio peculiaris Gratiae, quâ *Tu Ipse Serenissime Princeps* beasti Trifolium illud fratrum, qui nostrâ memoriâ Patriæ diversis nominibus simul servire studuerant; constabat illud ex uno Fœrderero, Pastore Buggingenfi jam defuncto, duobus Brodhagiis, quorum natus prior, Samuel Brodhag, Archivarius illius, qui Basiliæ est, Archivi ante paucos menses diem obiit supremum; natus autem posterior est Pater meus, in quem *Clementissimè* Physicatus Hochburgensis à *Principe Parente Tuo* collatus est, qui & *Tibi* adhuc *Principi Hereditario* suam Dissertationem humillimè dedicare ausus est. Accedit recentissimum Benevolentiae *Tuae* erga nostram familiam Testimonium, frater meus, Diaconus Aulicus Durlacensis, qui maximæ *Tuae* in se Clementiæ præco, maximo cum jure nec satis, nec dignè tamen deprædicare valet.

Hæc insignia *Domûs Tuae Serenissimæ*, *Tuique Ipsius* in nos *Benevolentiae Clementissimæ* Monumenta, ac præter hæc longè plura, quæ harum pagellarum cancelli recensere non permittunt, calcar addidere, ut & ipse, sequens patris exemplum, subjectissimè offerre *Tibi* coner tenue hoc studiorum meorum Specimen, de Purpurâ nempe; non illâ, apud mortales sic deprædicatâ, atque coloris ob suavitatem laudatissima, sed albâ, non verò albo, sed nigerrimo calculo dignâ, Rogans submississimè, ut *TU SERENISSIME PRINCEPS* ferenâ fronte ac eâ Clementiâ hoc Specimen accipias, quàm devotissimo atque de Patriâ benè merendi cupidissimo ex animo hunc conatum profectum esse, testari possum. Ceterum ardentissimis oro Supremum Numen precibus, ut *TE SERENISSIME PRINCEPS*, cum duobus *Ocellis Tuis Serenissimis*, *Te* inquam Ter-inclytum Heroem, sagâ, tógâque Præstantissimum atque Sapientissimum, Justitiæ summum Protectorem, Clementissimum denique Patriæ Patrem cum *Totâ Serenissimâ Domo* conservet.

conservet, Eamque ad ultimos seculorum dies perpetuo flore  
vigere, florere atque perennare jubeat. Ita ex intimo pe-  
ctore atque devotissimo animo voveo ; ac , quicquid in  
me artis, studiorum, scientiæ, ingenii virium fuerit, id omne  
subjectissimè ac submississimè *TIBI SERENISSE  
AC CLEMENTISSE PRINCEPS* commen-  
datissimum ut sit precor.

## SERENITATIS TUÆ

Dab. Basilæ d. 4.  
Maji 1733.

humillimus atque obsequiosissimus  
servus

JOH. MICH. BRODHAG



# S O N N E T.

**W**ie muß das schöne Werck/ der Schöpfung Mei-  
ster/ Stücke /

Deß Leibes Wunderbau so gar gebrechlich seyn !

Ein leichter Zufall reißt denselben plötzlich ein ;

Ein Tropffen stockend Blut/ ein Würgen/ eine Mücke.

Er wackelt / steht er gleich / bey jedem Augenblicke.

Bald kocht ein wilder Zast in Adern und Gebein.

Der Säffte Dickerung/ der Sennen Krampff und Pein

Erfordren von der Kunst ein tägliches Geflicke.

Dir ist / Gelehrter Freund / das schwehre Werck  
vertraut ;

Du solt ein schönes Haus/ von Gottes Hand gebaut/

Durch deine Wachsamkeit für Fall und Wanken fristen.

Besorg es fromm und klug. So krönet deinen Fleiß

Dort ein beständig Wohl und hier ein steter Preiß ;

Diß ist des Arztes Lohn/ und jenes eines Christen.

Aus wahrhaffter Hochachtung

und Ergebenheit beygesetzt

von

C. F. Drollinger /

Hochfürstl. Baden-Durlachischer Hofrath  
und Archivario.



**V**Ota ego cum nequeam dignis hic fundere verbis,

Nunc precor ut summus det Tibi vota Deus.  
Gratulor interea Tibi, tum mihi gratulor ipse,  
Talia cum meritis digna Brabéa capis.  
Sint Tibi felices semper Doctoris honores,  
Dum veniat cœli non periturus honos;  
Gaudeat ipse Parens, Princeps quoque jure favebit,  
Sitque Deo sua Laus, commoda mille Tuis.

*Ex animo gratulabundus  
apponere voluit*

N. L. C. E. S. S. H. E. P.



**V**Esiclis albis spurcat si Purpura Corpns,  
Veneno turbat Spiritus & Liquida;  
Planitiem nitidæ macæ scis reddere Pelli,  
Spiritus & Succos Arte novare doces;  
Strenuus hinc tenta Doctum superare Parentem  
Veste nitens albâ; hanc consuât Hippocrates!

*Ita foyet & applaudit*

JOH. CASP. MANGOLD.  
Phil. & Med. D.

*Qualis*

Qualis sit morbus , Medicis qui Purpura  
dictus

Alba, simul tolli qua ratione queat :

Egregio tradis Scripto, quo cognitus orbi

Hic fiat morbus, cognita cura magis.

Cognitus hoc ipso docto Tu Doctor es orbi,

Et summa titulum sumere Laude potes.

Præmia Purpureo tribuant de Suanguine nati,

Quin etiam ex alto dulcia quæque beent.

Id

QVoD VVegeMannVs habet per-  
paVCls fCrIbere Verbls



CAPUT






## CAPUT I.

### *Quid sit & dicatur Purpura alba.*

#### S. I.



E Purpura alba dicturo incumbit ante omnia, & nominis rationem, & rei definitionem dare, quò intelligatur, quid propriè sit illud, de quo in hac tractatione agatur, quod cum per se meritò à me postuletur, eò magis tamen mihi necessarium videtur, quoniam & nomen ipsum, & res vocabulo hoc denotata haud ubivis nota sint. Vocem igitur Purpuræ albæ Latinam esse facile patet, Germano verò idiomate audit: Der weisse Friesel. Denominatio hujus morbi cum à vulgo prodiisse videatur (atque à Medicis recepta sit,) admodum obscura est, atque incongrua, siquidem purpura coloris rubri speciem cuilibet notam denotat, quare epitheton: Alba non potest non ideam rei obscuram reddere: Occasionem autem denominationis hujus vulgo dedisse videtur cognatio hujus morbi cum alio, cui nomen purpuræ ab exanthematum colore, qui vocatur: Der rothe Friesel / der rothe Hund / Latinè Purpura. Est autem ille sicut hic, febris acuta exanthematica, habens nodulos protuberantes, colore purpureo: hic vero papulas albas pellucas habet, semperque maligna est, illa verò non item. Hinc vulgus ab hac



similitudine eum nominavit : Den weissen Griesel / Medici improprie Purpuram albam. Definitionem realem differemus in Cap. de historia morbi, quod ipsam clariorem & conceptui distinctiorem reddet, cum ibi commodius locum invenire videatur. In limine autem statim declaro, me non acturum de Purpura alba puerperarum, nisi forsan incidenter, nec de ullo alio morbo, qui ab efflorescentiis posset aliquam habere cum hoc similitudinem, sed de speciali hoc mox definiendo; illa enim, puerperarum nempe Argentoratensibus etiam nota est. Hæc verò, quantum mihi constat, planè ignota, aut certè oppidò paucis nota est, ratione subjectorum ægrotantium, in hac regione nostra Medicinam exercentibus occurrentium; & hinc Dissertationis Titulus.

## C A P U T I I.

### *Historia Affectûs, & genius huic morbo proprius.*

#### S. I.

**I**N tradendâ igitur verâ hujus affectus historiâ, me non Auctoritati aliorum, etiam Celeberrimorum Autorum, dabo, cum ii partim inter se non convenient multis in circumstantiis hujus morbi describendis; dum unus dubitat, an sit Purpura pellucida eadem, quæ alterius Purpura alba, alter hanc febrem acutissimam & vehementem, alius lentam, alius eam ad dies criticos inclinare, alius contrarium scribit, & quæ plura sunt ejusmodi, & in ulteriori deductione forsan occurrent; sed ea describam ac fideliter tradam, quæ mihi ipsi in tam copiosa, imò copiosissima praxi, in loco, ubi propter strages, quas edit hic morbus, sæpiusque grassatur, notissimus est; Ubi cura ægrorum Medico-Clinica mihi demandata fuerat: quæ mihi, inquam, sollicitè & curiosè omnia circumspicienti, quærenti, indaganti, non timidè inquirenti, manibus palpanti, oculis intuenti, contagium nunquam reformidanti, & aliquot hoc morbo defunctorum corpora secanti occurrerunt, cum mihi jam tum animo federit, de hac Ma-  
teriâ



teriâ cum tempore specimen edere , præsertim cum multi Medici timidiore sint , quam ut in tali morbo curatiùs cuncta explorent , id quod sæpe causa est dissensûs Scriptorum.

§. I I.

Hic itaque affectus noster , s. Purpura alba est Febris acuta continua , maligna , exanthematica , quâ Natura , s. Principium vitale miasma quoddam subtile fermentescens putredinosum per Diapnôen , seu formâ halituosâ exterminare intendit , Motibus Se- & excretoriis ultra naturalem consuetum ordinem auctis.

§. I I I.

Initium morbi fit à vicissitudine horroris & æstûs inconstante , & alternante , quasi in Erysipelatis accessu , appetitus mox languet , vires cadunt , animus tædio quasi marcescit , præcordia premuntur angustiis & anxietatibus , ac laboriosa respiratione , quæ profunda ac difficillima respiratio huic affectui propria quasi est , ac tam diu durare solet , ac vigor aliquis morbi adest , nec nisi cum morbo penitus solvitur , ita ut nobis in praxi pro signo fuerit statûs viscerum internorum , Nosque , unus ab altero statum ejusmodi ægri exploraturi , interrogaverimus : Zieht er noch / i. e. num morbus nondum mitior est , num adhuc profundè , ac tam ægrè spiritum trahit ? Febris non est valde acuta , pulsus interdum magis lentus , & sani ferè instar , ut qui non aliunde hujus morbi indolem norit , putaret , rem non adeo magni esse momenti , certas exacerbationis periodos observare nunquam licuit , ut morbo eas proprias , & statas asserere liceret , quamvis in nonnullis ex respiratione collegerim , versus vesperam patientem durius pati , quod vero ab aliis quoque causis oriri potest.

§. I V.

Hunc Morbum si accuratè observes in simplicitate sua solum , sine complicatione cum alio , eum non inclinare videbis ad sudores verè sic dictos , guttulosos , madefacientes , nisi alias patiens his assuetus fuerit , quod & affectui semper præjudicium affert , febris enim pulsusque talis sunt naturæ , ut facile videas , naturam non intendere resolutionem sanguinis in serum , ejusque excretionem :



Miasma enim non ejus est naturæ , ut per hos ejici velit , aut possit , observabis verò continuam diapnoën , cutemque humidulam , sique contingat , Purpuram sub copiosis sudoribus provenire , facile retrocedit , patiensque haud multum levatur , cum jam aliàs incertæ ac infidæ sit indolis , ac sæpius sine ulla manifesta causa evanescat , ac retrocedat , nunquam non cum gravioribus succedentibus anxietatibus , atque deliriis , seu soporosa somnolentiâ.

S. V.

Quoniam autem ibi locorum mos est , confestim ad pellentia atque alexipharmaca confugere , non apud vulgaris tantum , sed & distinctioris conditionis homines , venenum ( ut loquendi formula est ) à corde depulsuri , sie wollen das Gift vom Herzen treiben/ concurrente etiam ordinariè nimio hypocausti calore , fit inde ut sudores quidem copiosi prorumpant , & perpetuò madeat , imo langueat Patiens , morbus autem non levetur , sed turbetur , ac Materia Morbosa tantum abest ut expellatur , ut potius diffundatur , ac loca excretoria subterfugiat : nonnunquam verò nec hîc sudatorius scopus obtinetur , è contrâ sanguis impellitur , ut natura , imprimis Plethora obruta hæmorrhagicos motus suscipiat ; plerumque sub ejusmodi statu purpura se prodit ante eruptionem suam per odorem quendam specificum , nares ostium intrantis ferientem , acidulum , ut sæpe in ostio stans affirmare potuerim , hîc patientem decumbere purpurascentem.

S. V I.

Antequam Exanthemata erumpant , ægri de pruritu subtercutaneo conqueruntur , & vel in gravissimas anxietates cordis , animique incurrunt , imò sensibiliores in deliquia animi , quæ , si ab initio morbi occurrunt , adeo Medicum terrere non debent ; post Eruptionem autem exanthematicam si appareant , meritò suspecta esse possunt , ac debent ; indicant enim hostem nondum esse superatum , principiumque contra hunc dimicans ipsum desperabundum quasi languere , & anguem in herba latere. Exanthemata verò erumpunt circa quartum diem , vel etiam seriùs , formâ pustularum albarum granis milii decorticatis similium , cum pro habitu corporis superficies ejus rubedinem quandam offerat pallidam , quod verò non



non in omnibus fieri solere animadverti. Differentiam quæri ac statui inter Purpuram albam & pellucidam, novi, an vero magni sit momenti, dubito, mihi quidem videtur levissima, nec essentialis, magis in differentia coloris per cuticulam & cutem transparentis, quam in diversitate morbi ejusque symptomatum consistere. In Purpura nostra alba communi pustulæ sunt sanè ordinariè diaphanæ, & humiditatem subtilem continent, potest autem facile differre ex variis causis, pro qualitate lymphæ aut feri, quo natura pro vehiculo miasmatis expellendi utitur, pro puritate superficiei externæ superficiei cutis, pro consuetudine subjecti in excretionem sudorifera, prout nempe sudoribus largioribus & frequentioribus asueverat, pro regimine in præsentem jam morbo adhibito &c. Afferere itaque audeo nostram hanc Purpuram omni quoque jure pellucidam appellari posse, sicut & Celeberrim. Dn. Professor Junckerus, Præceptor olim ac Patronus meus, nunquam satis mihi suspiciendus in Conspectu suo Medicinæ p. m. 326. sub signis Purpuræ albæ hæc expressa verba ponit: Diaphanæ sunt hæc pustulæ.

§. VII.

Tempus durationis hujus morbi, si simplex sit, ultra diem nonum, undecimum haud facile se extendit, exanthemata enim si morbus ritè procedit, ubi per 4. circiter dies in cute subsisterint, pustulæ exsiccantur, & decidunt, febrisque cessat: ubi vero malignior est, aut copiosior, quam ut superari, aut expelli queat, plerumque nono, interdum tamen undecimo cum vitæ jactura terminatur. Hactenus de idiopathica, sive solâ simplice Purpurâ, quatenus cum alio non complicatur, dictum est.

§. VIII.

De hac igitur porro sequentia notanda sunt. I<sup>o</sup>. Quod in genere in his Regionibus rarissimè ( non quod rarò saltem, consultò dico ) simplex sit. Causam hujus phænomeni, atque veritatis, in sequentibus, ubi ansa dabitur, explicemus, II<sup>do</sup>. enim annotamus, quod facillimè complicitur cum aliis morbis tam acutis, quam chronicis, ut certo sensu symptoma, simulque novus morbus, primarius, capitalis dici mereatur, quoniam ille morbus cui accessit sive successit, s. cujus symptoma sit, plenariè ferè cesset,



hic verò non primatum solum occupet, altero quasi in nihilum redacto, ac si nunquam adfuisset; summâ: Dieser spielt den Meister / præsertim verò & maximè hoc contingit in febribus intermit- tentibus aliisque morbis chronicis. In acutis quidem non semper contingit, ut morbi antegressi indoles evanescat, sunt enim quo- rum Schema per aliquod tempus retinet, sub eoque lateat, inopi- natò autem emergat, suasque proprias Scenas ludat; ita ex acutis & quidem contagiosis malignis nullæ sunt, quibus magis associetur, atque familiariùs, quam febris sic dicta Catarrhalis Maligna Pete- chizans, Petechiæ ipsæ, & Purpura rubra, ita ut epidemicè grassanti- bus in mensibus, Februar. Mart. Aprili se aut illis jungat, aut Pe- techias in patientibus sequatur, si una cum petechiis prorumpat: status admodum est anceps & periculosus, & ex his pauci evadunt.

S. I X.

In statu hoc complicato hæc febris paroxysmum suum inchoat circa vesperam, & per noctem increbescit, deliria ita sunt vehe- mentia, ut multorum hominum auxilio sæpe opus sit ad violentiam talium cõercendam, pulsus tamen & urina sanis valde sunt similia, deliria vero magna, ita ut patiens per totum morbi tractum ad mor- tem properare videatur, per totum paroxysmum cutis madida est, multum sudat, atque angitur patiens, animus semper anxius, in- quietus, de futuro timens malo ordinariò præfagio; si verò non statim cum Petechiis se monstret, patiens verò post septimum diem neque pejus, neque melius se habeat, adhuc certò exspectanda est Purpura: ubi supra septimum diem patiens periculosè ægrotavit Pe- techiis, nec illæ mitigentur, Purpurâ superveniente albâ plerumque morbus fit levior; nonnunquam Febri Petechiali accedit purpura, ita, ut loco petechiarum (quæ maculæ sc. non sunt de essentia hujus febris, siquidem multi sine harum proventu pereunt, multique sine illis ad sanitatem redeunt) proveniat, priori jam quasi superato, tumque affectus sæpe trahitur per 3. aut 4. periodos septenarias, ubi demum patiens succumbit, rarò unus evadit; eodem propemo- dum modo se gerit in societate cum purpura rubrâ, cui tam sæpe se jungit, ac præcedenti, iisdemque ferè cum circumstantiis, nisi quod purpura rubra per se mitioris sit indolis, quam Petechiæ.

Non



Non raro quoque Febribus inflammatoriis sese associat, uti secundum testimonium Actorum Berolinensium, Peripneumoniæ, aliisque Febribus acutis.

§. X.

III<sup>o</sup>. Se jungit Morbis Chronicis, uti Febribus intermittentibus, tertianæ, quartanæ, ita tamen, uti supra jam innuimus, ut prior morbus quasi totus fugetur, locoque accessus talis febris, symptomata exacerbentur; apparent deliria, pectus improvisò quasi gravatur, respiratio fit laboriosa, quæque alia sunt ejus Symptomata, accedunt, plerumque verò patiens talis diu vehementer ægrotat, mutatis in aliam faciem circumstantiis Febris intermittentis, donec tandem purpura alba magno cum terrore ipsius patientis & adstantium sese ostendat, sic ut appareat, naturam magno hinc cum conamine in ejus expulsiōe sudare; nesciunt enim homines, unde tam improvisò patiens simplici Febre intermittente hætenus decumbens adeò periculosè subito ægrotare ineipiat; & hic Medicus caveat, ne quid medicamentis sinistri perpetret, facilis enim hic lapsus seu offensio, & si forsan, cum plerumque pectus patiatur, tussisque adsit, pro catarrho tractet, omnia ἀλόπως agat, imprimis si officiosus esse studeat, & urgentibus amicis ægri obsequi velit; Cura hic aut adhibeatur expectatoria, aut tamen, quod his circumstantiis vix ipsum fallat, purpuræ tractationem instituat, ne tamen ad alexipharmacorum subsidia confugiat, aliàs rem sine tropo pejorem redditurus.

§. XI.

Operæ pretium duco hoc loco exemplum hujus Phænomeni proferre. Vir quidam consistentis ætatis, vitæ lautæ assuetus, plethoricus, mediâ æstate afficitur tussi, quæ omnibus, quæcunque à Medico ejus, rationali certè, atque experiētiâ claro adhibebantur, medicamentis ne minimum quidem cedebat prioribus 7. diebus, tum accedebat febris tertiana ordinaria, seu potius ut eventus docuit, tertiana simulata, larvata; Vacuo seu intercalari die bene se habebat, febrili diē lecto decumbebat, septimo vero hujus die oritur singultus, qui non vehemens modo, sed & frequens ipsum vexabat, durabatque usque ad 14. mum morbi diem, ubi  
ex



ex aliis accedentibus bene dignosa poterat præsentia inflammationis; erumpit hoc ipse 14. die passim sparsimque, mox hîc, mox illîc, Purpura alba, minuitur successivè & vehementia & frequentia singultûs, qui, postquam purpura totum occupaverat corpus, cessabat, die Augusti 30<sup>mo</sup>, qui erat dies 21<sup>mus</sup> morbi, corpus spissè oblitum erat purpurâ, singultus aberat, & sic satis bene se habebat Patiens, nisi quod adhuc respirabat minùs commodè, ut Amici eum extra omne periculum putarent. Medicus verò huic morbo non fidens eos præmonuit, ne securi essent, sed cum tremore gauderent, præscribebat remedia convenientia; Nihilominus patiens morbi die, ni fallor, 25<sup>to</sup>, non modo pejus se habere incipit, ac de novo quasi animi angoribus opprimitur, sed illo die ipso subitò expirat. Petierunt amici sectionem cadaveris, quam Medicus hâc tempestate calidâ non immerito recusabat, cum præter necessitatem id facturus videretur.

## §. XII.

Porro Hypochondriaco malo quando accedit, res semper in ancipiti versatur; In hoc enim evenit, ut aut difficulter purpurale miasma ab internis visceribus expellatur, ubi mors certa quasi & subitanea est; confer. infrâ §. XIII. Circumstantiæ hujus morbi cum malo hypochondriaco complicatæ, ut uberius deducuntur, dignæ sunt. Priori enim casu omnia symptomata in superioribus annotata longè graviora sunt, quam si cum alio quocunque ferè morbo complicata sint; versus illos enim dies, quibus purpura excerni deberet, Natura plethorâ obruta, hujus diminutionem per Evacuationes sinceras intendit, nullibi vero penetrare potest; propter insignem sanguinis spissitudinem ordinariè cum plethorâ conjunctam, & viscera infarcta atque oppleta; hinc congestiones particulares vel ad caput, pectus, vel loca hæmorrhoidalia, hinc ordinariè vehementia deliria, aut sopores, hinc affectio capitis temulenta, aut constipatio & extensio vasorum sanguiferorum & partium musculosarum, ut facies hominis fiat quasi obmutefacti. Er siehet aus / wie ein tummer / erstaunter Mensch / torvus atque truculentus intuitus, Oculi ferè rigidi, ut tantum albedo eorum appareat, ἀφωρία aut vera, ut non possint, etsi vellent, aut ex tædio ipsius naturæ, situs totius corporis perpetuò fere immotus, respi-



respiratio ex imis tracta, suspiria profundissima, sine emissione tamen ullius toni, aut vocis, & si aliquid interrogentur, nil moventur, quam ut minaces quasi adstantes intueantur, auditus difficilis, ut intensissima vociferatione opus sit, si audiri velis; sub his urina pauca, parum tincta, alvus stricta; ac, quamvis hæmorrhagia sequatur, parum inde levaminis; certè nil boni effectus in tot exemplis unquam vidi, aut si sequatur hæmorrhagia copiosa, plerumque adeo excedit, ut continuet ad mortem usque, aut ad tantam debilitatem virium, ut de summa rei haud bene sperari possit.

### S. XIII.

Notum est mihi exemplum Hominis, nomine Padevviz, mihi familiarissimi, summè hypochondriaci & plethorici, quod non possum non hîc referre, qui, cum per 5. dies per alios à me peteret, ut ipsum visitarem, semperque eadem conquereretur, languorem nempe actionum voluntariarum summum, ita ut vix pedem de terra tollere valeret, tædium animi sibi ipsi invisum, plenariam appetitus prostrationem &c. Ceterum se bene habere affirmaret, præscripsi, quæ decebat, admonui autem, ut se in Nosodochium nostrum conferret, me enim timere Purpuram, quæ nunc grassaretur, obsequium recusabat, tandem verò morem gerens, se eò transferendum curavit, ubi septimo die Congestiones ad caput manifestò se prodebant, pauxillum sanguinis ex naribus stillabat. Ceterum Symptomata modò memorata non solum non remittebant, sed augebantur; Aliquoties adhuc se aliquot guttulæ sanguinis ex naribus ostendebant; Purpura vero sub his circumstantiis non prodibat, pulsus apparebat satis fortis, sed tardus, donec versus diem nonum aliquot pustulæ albæ se prodere inciperent in pectore, Mens ipsi hætenus quasi sopita paululum redire videbatur, mox autem omnia mutabantur de novo; animadvertēbatur diarrhoea involuntaria, donec tandem hæmorrhoides fluere inciperent (erat autem malum hypochondriacum in Eo jam ad hæmorrhoides determinatum, ut aliquoties antea se has animadvertisse diceret, quamvis ætas ejus 26<sup>um</sup>. tum annum non transenderet) quæ brevi ita excedebant, ut in profluvium degenerârint, ac lintea sanguine quasi lavarentur, sanguisque in humum per strata lecti penetraret, ipso



hæc nesciente ( siquidem omnibus Sensibus externis carebat ) usque ad extremum vitæ halitum, quem 1<sup>mo</sup>. die morbi exspiravit. Aliquot tamen ejusmodi Patientes ex limine quasi palatii mortis revocatos vidi.

§. X I V.

In hoc malo , Hypochondriaco sc. nonnunquam Purpura se ei complicans , sive potius Miasma ejus à tali corpore susceptum , planè non , nisi in ultimo vitæ & mortis conflictu expellitur ; Circumstantiæ & symptomata inferius in 2<sup>bus</sup>. exemplis , qui totum Morbi genium multum illustrabunt , adducentur , sub N<sup>o</sup>. V.

§. X V.

Ulterius ; hanc cum Podagra , & quidem semper periculosissimè complicantem se vidi , itemque cum Malo Ischiadico.

§. X V I.

Morbus hic IV<sup>to</sup>. nulli se tempori alligat , per totum anni tractum ipsum offendes , quod inde jam patere potest , quod tam diversis morbis diversa tempora sequentibus implicetur. Epidemicè autem , quando grassatur , observat menses Febr. Mart. Aprilem , imò & Majum , item tempus Autumnale , hocque habet commune cum Febribus Malignis & Petechizantibus , quibus , uti supra dictum , complicatus longè magis grassatur , si accurate observes , quàm solus & simplex , ita tamen , uti jam monui , ut verè Epidemicè regnet , quamvis sub harum Febrium Schemate , & omnium Morborum , qui per totum annum , quilibet sua Periodo , regnant , larvâ utatur ; Ita Verno tempore sub Catarrhalibus malignis , petechiis , Purpura rubrà , Febribus aliis acutis , continuis , Rheumatismis , Podagra , Ischiade , tempore anni provectioni sub Tertianâ , sub exacerbationibus mali Hypochondriaci & Hysterici : Autumno ferè sub iisdem figuris , Febre quartanâ , tussibus , Catarrhis &c. multifarias ac funestas scenas suas ludit.

§. X V I I.

V<sup>to</sup>. loco ex his omnibus collectim , atque Observationibus infra jungendis docemur , Affectum hunc adeo versutissimæ , fallacissimæ ,



mæ, & versipellis indolis esse, ut nulla propria & certâ figurâ, sed modò sub hoc, modò sub alio Schemate se sistat, vereque Malignus sit, & ubique fere, etiam ubi eum minimè timeres, uti jam satis ostendi, lateat adeo occultè, malitiosè, crudelis & atrox, ut Medicis non mediocriter, & leviter peritè doctis, his suis multifariis Larvis imponat, nec circumspèctissimus & expertissimus gloriari possit, se indolem ejus propriam atque astutias, fallacesque latebras, perspecta habere, sæpe ipsum non quæreret, ubi subitò cum cunctis horrendis suis Symptomatibus exoritur, ac quamvis jam oculis pateat, ut Medicum, hunc Hostem accuratissimè observaturum, eique omni modo repugnaturum, ex insidiis, imo apertè fallat; contingit enim sæpius, ut Patientes in optima euphoria constituti, ut Medicus ipse haud immeritò non modo bene sperare posse videatur, sed quasi securus de sinistro eventu esse, subitò aut in pejus ruant, aut planè ab hoc hoste occidantur. Hoc quoque succurrit nunc, ut Medicus sibi in aurem dictum patiatur, si grassantibus Febribus spuriiis, præsertim malignis, patientes tolerabiliter se habent, in hypocaustis adhuc ambulent, portiones sua ciborum vescuntur, & de lassitudine tantum quadam, & prostratione virium universali querantur, aut quod non omninò bene se habeant: *Es seye ihnen nicht recht* / ibi Medicus non fidat futuro, sed clanculum & de longinquo contra hunc hostem se paret; Hinc, ut puto satis apparet, qualis hic sit Hostis, & quam parum ei fidere liceat, quod ex 2. exemplis annexis clarissimè patebit, & hanc Positionem confirmabit, atque illustrabit.

### S. X V I I I.

I. Dominus Mettermann, unus ex Præceptoribus Pædagogii Regii, quod Halæ est, Juvenis 24. circiter annorum subitò incipiebat conqueri de lassitudine quâdam sibi aliàs non consuetâ; *Er seye über die Gewohnheit matt; möge fast keinen Fuß vor den anderen setzen* / Ceterum cibo & potu utcunque fruebatur, faciem, ut aliàs, omnino bonam præ se ferebat, functionibus suis fungebatur ad 11<sup>um</sup>. usque diem, quo ipso, assumpto adhuc prandio, improvise petit, ut sibi lectus sternatur, cum hætenus per diem eo uti noluisset, in lectum se projicit, simulque Spiritum ul-



timum efflat, prorumpentibus tamen brevi ante obitum pustulis aliquot diaphanis in pectore & circa caput. Notandum hic, eo tempore Febres malignas, imprimis petechizantes cum Purpura albâ ita grassatas fuisse, ut jam passim sermones audirentur de tollendo cum Civitate nostrâ commercio, Præsidium quoque Militum in urbem proximam eductum est. II. Dominus Neubauer Collega ejus, qui jam primâ periodo 7<sup>tenariâ</sup>, ut & 2<sup>dâ</sup>, nempe 14<sup>to</sup>. die crisin morbi sui expertus videbatur, siquidem ad speciem benè se habebat: ut eum quoque isto die Medici restitutum existimantes derelinquerent; ipso vero illo die, horâ post meridiem 1<sup>mâ</sup> invadunt eum magnæ præcordiorum angustiae, Purpura se leviter ostendit, mox vero iterum evanescit, patiensque brevî vitâ excedit, cum adhuc ante meridiem in publicum prodire posse videretur. Recordor adhuc Virginis cujusdam, quæ eodem morbo laboraverat, cum hæc prima vice, restituta omnino, prodiret tempestate frigido-humidâ, in plateâ frequentissimâ subito extincta in terram procidit.

§. XIX.

Morbus hic quam difficulter dignoscatur, puto ex prægressis satis liquere; Imminentis signa nulla sunt, nisi jam superius memorata, nempe cum post petechias aut Purpuram rubram status morbi aut maneat, ut nec in pejus, nec melius mutatur, aut si post hæc Exanthemata novi angores, angustiae, difficilis respiratio, anxietas animi & timor ipsius Patientis ne moriatur &c. se manifestant, ibi sane Purpura prædici poterit; aut si Purpura Epidemicè cum aliis morbis complicata grassetur, si illi morbi genium suum sequi non videntur, sed solito aut acerbiores sint, aut eorum Exanthemata tardius procedunt, aliquid hariolari licet. Indubia autem ac certa Diagnostica signa tradere velle absurdum esset, cum hic affectus sit per se quasi occultus, donec se cum omnibus Symptomatibus suis oculis sistat, præsensque per Pustulas albas nobis se offerat; ego certè fateor, talia me nescire; quæ enim adhuc ei propria deprehendi possent, sub figura Schematum, sub quibus tacitè sæpe ludit, absconduntur; conferatur autem ad hunc locum totus Numerus V<sup>tus</sup>. præcedens cum casibus ibi enarratis.

§. XX.



§. XX.

Purpura alba quando retrocedit, sæpe fit lethalis, aut tamen omnia exasperat Symptomata, aphthas, deliria vehementia, singultum, maximas anxietates inducit, si iterum expellatur, sed nihilominus Symptomata à retrogressionem illius producta non mitiora redduntur, fidei sanè est suspectæ, & gangræna in visceribus internis timenda. Supra jam observavimus, illam quæ simul cum petechiis provenit, imprimis si mature id fiat, 3. nempe vel 4<sup>to</sup> die periculosam esse; eam autem, quæ post petechias sequatur, melioris spei esse. In quibus denique morbis præ aliis mali sit Prælagii, jam quoque indicatum est.

CAPUT III.

*Pathologicus Purpure alba Nexus.*

§. I.



Andem etiam series rerum me fert ad id, quod in Medicina tam theoretica, quam præsertim practicâ pro Cardine meritò haberi debet, & omninò id est, quod omni fere ævo tot Difficultates, ex his verò pro hominum arrogantia innata, dum quilibet harum Extricationis gloriam captabat, tot dissensus inter Medicos, totque Systemata peperit, puto Ætiologiam morborum. Ego his omnibus in medio relictis, quæ in hoc affectu de ejus causâ diversè pro cujusque inclinatione possent proferri, ea dicam & proferam, quæ in hoc affectu mihi Veritati proximè accedere videbuntur, sine formidine contradicentium, nec ea pro certis venditabo. Si vero usquam, sane hic Ætiologia spinosa atque difficilis est.

§. II.

Tres igitur Causas in quoque Affectu considerandas perquirere lubet. 1. Causam continentem, s. proximam, hîc Materialem, (dantur enim affectus morborum sine causa materiali) 2. Causam efficientem, & formalem s. instrumentalem conjunctim. 3. Causas præcatarticas. 1. Igitur in definitione Morbi dixi esse, Miasma



quoddam subtile fermentescens , s. putredinosum peculiaris indolis , adjunxi quoque generalem ejus Naturam sub his , quod sub formâ halituosâ exterminetur , seu exterminari debeat ; id est , Materia 1. est subtilissima ; 2. ad corruptionem sphacelosam inducendam promptissima , 3. quantitate tamen pauca. Primum exinde apparet , quod invisibilis Halitûs formâ de corpore in corpus transferatur , ac non possit , nec soleat crassa forma iterum ex Corpore expelli , nec motibus fortioribus aut impetuosius , sed moderatis admodum ; hinc ejusmodi Febres malignæ , & calore & aliis exacerbationibus , ut & horum omnium autore , pulsu , & tono sunt lenissimæ , siquidem rectè sibi constant. Secundum , quod nempe summè activæ sit indolis ad plenariam destructionem Oeconomiae vitalis , & perniciem corporis illam , quâ majorem Hostem habere nequit , sphacelosam nempe corruptionem producendam , elucet ex oculari Autopsia , quam quotidiana experientia ob oculos ponit , quâ omnibus notum est , quam brevi ambitu Malignæ Febres includantur , quarum pleræque ultra primum septenarium vigorem suum non extendunt , aliquot etiam non ultra quatrimum , & si sub hoc temporis spatio non maxima pars causæ materialis expulsa sit , summè ambiguè exeunt ; ac denique ex magnâ illa stige , quam ubi grassantur , edunt. Paucam eam quantitate esse posse , vel morsu canis rabidi , quamvis perexiguo , patere potest.

### S. III.

Quo vero Genio , s. Naturâ specificâ sit hæc Purpuræ albæ materia , s. Miasma , secundum Figuras particularum ejus , determinare , ideo mihi non sumo , quoniam maximè subtilis ac invisibilis est , ac propterea ejus natura , quâ ab aliis differt , à priori nec determinari possit , nec utilitatis id scire , esse videatur , ideo quoniam eam corrigere aut mutare non licet , cum summè activa sit , ac effectus suos , quos respicere magis debemus , quam quibus potentiis figurarum illud fiat , prius ediderit , quam de illo operandi modo decernamus , nedum ut illam evertere possimus , multo citius multa millia Hominum necaturam , quam de ea inter nos convenerit. Multum dixisse is mihi videtur , qui ex effectibus son-  
ticis ejus virtutem maximam & indolem generalem à posteriori detegit ,



detegit, imprimis cum nec ipsi naturæ ejus essentiam corrigere, nedum destruere, sed unicè, eam ejiciendo & ex M. S. planè proscribendo ejus effectus noxios prohibere liceat, quod ex Methodo ejus hanc tractandi & brevi temporis ambitu, quo hoc efficere conatur, æstimare licet: & si intra hunc fieri non possit, quam irreparabilis, certa tamen ac celera sit noxa. Potius itaque ad naturam effectuum, qui hujus Vi in corpore producantur, respicere conducet; me ipsum sane Miasma hoc secundum dictas circumstantias definire ac determinare non posse, profiteor; Febrem autem hanc verè Malignam esse, tam ob materiæ pessimam naturam, quam ipsius Febris malos mores, ad quos ex errore dirigentis inclinatur, Historia affectûs docet.

§. I V.

Causam efficientem atque formalem hîc agnosco Principium Rationale cum Motibus suis finalibus, seu secundum rationem, moraliter s. propter finem agens. Non ad causas Physicas proportionatè & mensuratè hîc omnia contingunt, sed multa sunt, quæ etiam possent non fieri, aut aliter fieri, sed diriguntur à causâ ad certum finem, proportionatè, & cum ratione agente, seu ex æstimatione, non semper tam illius, quod actu jam fit, sed noxæ adhuc eminens imminentis & periculum minitantis, sive nunc Animam ipsam, quod mihi arridet, s. Archæum quendam, s. Spiritus quoscunque intelligere velis, mihi perinde est, modò tali Principio convenientes, nec ἀλλότρια proprietates, quæque in id cadere nequeant, attribuantur; Et cum Therapia rationalis Medica niti debeat, tanquam fundamento, Pathologiâ Medicâ, non Physicâ solùm, ac præsertim in nostro hoc affectu Medicus agere debeat secundum Methodum Naturæ, ostendam quibus modis Natura rationaliter, ac cum fundamento hîc agat, ut etiam à quocunque ratiocinandi compote possit clarè ac indubiè agnosci, Methodum hanc Naturæ esse Rationalem & unicam, quæ hîc eligi possit.

§. V.

1. Rationi conforme est Materiam, Oeconomiam vitalem destruendi, ac noxam irreparabilem inducendi aptam, potius ex toto Corpore, seu ejus nobilissimis partibus eliminare, quam diu eam



eam tolerare, quæ celeris sit activitatis ad inferendum maxima  
damna, eique spatium concedere potentiam suam exercendi. Hoc  
vero 2. Natura præstat, expellendo Materiam ad corporis maximè  
extremum Organon excretorium, ad illud, & per illud, quod Ex-  
cretioni subtili halituosæ aptissimum, simul vero securissimum est,  
Cutem nempe, partesque circa illam affines, ubi minimam noxam  
inferre potest. 3. A visceribus subtilibus, ad vitam maximè neces-  
sariis, ac nobilissimis. 4. Intendit & peragit hanc expulsionem  
Motibus huic materiæ aptissimis, moderatis sc. non tumultuosis  
& fortioribus, sanguinem nimium fundentibus, quibus potius in  
massam humorum non modò diffunderetur materia, sed sanguinem  
adhuc aptiorem redderet per hanc resolutionem suscipiendæ cor-  
ruptioni intimiori, sed talibus directionibus motuum, qui subtili-  
bus transpirationibus maximè quadrant, unde 5. Febris talis sui  
genii est, & secundum calorem & pulsus magnitudinem atque ce-  
leritudinem lenissima. 6. Non fert, nec commotiones, nec eva-  
cuationes fortiores, quamvis & ad eundem locum excretionis du-  
cerent, quò natura inclinat. 7. Multo minus fert illas evacuatio-  
nes, quæ per aliena loca fiunt, e. g. per Ventriculum, Hæmorrha-  
gias, Diarrhoeas &c. quoniam hinc particulares instituantur neces-  
se est congestiones & directiones tonicæ, quæ materiam ab extre-  
ma corporis superficie repellunt, & interioribus periculum minan-  
tur, cum ab his potius eam depelli debere facile cum ratione con-  
veniet. 8<sup>vo</sup>. Cessationem nimiam ægerrimè tolerat ob rationes jam  
sæpius dictas, & cuique facile obvias,

## §. V I.

9<sup>no</sup>. Materiali Causâ aut nimium potente, aut Visceri alicui  
tenero & vitali incumbente, ut de illo meritò timeatur (sicut im-  
primis Pulmonibus infestam esse, & facillime quoque in illos pene-  
trare è posteriori constat) aut difficile sit illam ita colligere ut à vi-  
sceribus depellatur, Mora tamen sit periculi plena, aut si jam ita  
imminens est, ut Noxa sit proxima, sive jam major facta, quam  
tàm citò emendari, simulque Materia expelli queat, ubi duo Ne-  
gotia, quorum quodlibet per se omnem attentionem atque curam  
meretur, concurrunt, his, inquam, Circumstantiis, animus an-  
gitur,



gitur, confunditur, ex sensu vitali & æstimatione periculi, atque partium nobilitatis à priori; unde deliria, animi deliquia, motus Materiæ expellendæ minime congrui, aut præ nimia occurrendi his malis festinatione gradu, ordine, successu, continuatione excedentes, aut timiditate, & Consilii inopia deficientes, utrumque cum summæ rei summo periculo, anxietates, inquietudines &c. 10. Adeo provida est Natura, ut, cum tantæ subtilitatis sit hæc materia, eam involvere labore, & quasi irretire ac capere per humorem huic fini aptissimum, Lympham sc. Hæc enim viscidiuscula & gelatinosa est, dum placidè hanc materiam ad Peripheriam amovere laborat atque intendit, eamque hoc Humore circumdare solet, quidein in pustulas attollitur; Hunc ergo non pro vehiculo saltem miasmatis habeo, quam potius Involuero, multo minus pro Subiecto ejus proprio. Et hæc 10. Monumenta sunt, ex quibus omnium Phænomenorum in hoc affectu notatorum, ut & Medendi rationes desumi possunt & debent: Cumque convenientia harum actionum cum Ratione, fatis, ut puto, appareat, properabimus ad Methodum hunc affectum tractandi, paucis adhuc non prætermittendis, additis.

## S. VII.

Tertiò posuimus Causas procatacricas, vel præ aliis ad hunc Fomittem morbosum excitandum & producendum aptas, sub quo titulo comprehendo omnes eas, quæ utramque præcedentem, tam proximam nempe, materiale continentem, quàm secundam excitare possunt; sub hanc igitur Classem voco etiam Subjecta maximè idonea ad recipiendam & fovendam hanc causam, quæ observatio quotidiana talia esse docuit. Purpura alba igitur, quando epidemice grassatur, sine discrimine omnes invadit; maximè tamen præ aliis huic obnoxii sunt homines temperamento, sanguineo-cholericis, & sanguineo-melancholicis, habitus corpulenti, plethorici, ita ut audacter affirmare ausim, horum numerum adeo superare proportionem ceterorum, ut ex 100. patientibus, Purpura albâ laborantibus, vix 10. macilenti habitus occurrant, deinde timidi præ ceteris. Extra Epidemicam constitutionem verò ante  
C alios



alios invadit hypochondriacos, nec hos, quod studio moneo, sine discrimine, sed illos potissimum, qui aut malum hoc exasperârunt per commotionem plethoræ & motuum spasticorum, sive fiat per Motum Corporis Voluntarium nimium, sive per potus spirituosos, commoventes, sudoresve repulso; ubi adhuc notandum, si tales hypochondriaci, (uti aliquoties vidi) ad mitiganda molesta symptomata sua Venam secant in ipso Paroxysmo, non modo hoc malum exasperari, sed sæpius transitum fieri in hunc morbum. Item quibus hypochondriacum malum jam determinatum est ad hæmorrhoides, hæc vero non satis succedant, sed motus ad has experiantur fortiores, illisque non penetrantibus incidunt in motus spastico-arthriticos, Ischiadicos, & similia, præsertim, si hi motus sint vagi, mox internas, mox externas moliantur Hæmorrhoides; his non rarum est incidere in hunc Morbum, & quidem admodum periculose, de quo aliquot insignia enarrare possem exempla, nisi prolixitatem secum ferrent.

### S. V I I I.

Causæ porro Octasionales esse possunt. 1. Aër, particulis talibus fermentescentibus repletus, quæ deinde in corporibus corruptionem sui generis similem specificam progignunt. 2. Contagium ab aliis eodem miasmate infectis communicatum. 3. Decoctum potûs Coffée nimis saturatum & frequentioris usûs. 4. Potus spirituosus, præsertim in hominibus vitæ sedentariæ addictis. 5. Magnæ refrigerationes, vehementes exæstuationes. 6. In cunctis ferè morbis Regimen, & Medicamenta calida, præsertim in morbis catarrhalibus, petechizantibus, puerperiis. 7. Suum quoque contribuit Aër Halensis, qui semper heterogeneis particulis Ono-Feis refertus est, propter salinas, salisque continuam Confectionem, quæ peragitur ope Carbonum bituminosorum, vulgò: Steinfohlen / qui continuo vaporem densissimum ac nebulosum edunt, accedente motu intestino facile in malam dispositionem abeuntem; 8. Aqua etiam puteorum universa eadem Materiâ est referta. 9<sup>nd</sup>. Vitam denique desidem, otiosam, ubi aut per commotionem internam Massæ humorum sanguineorum,  
aut



aut per alterationes motûs tonici externas ( quò & Terrorès referes ) humores spissi subitò commutantur , confunduntur , multum huc conferre , generalis Observatio , & quotidiana convincit Experientia , dum rarissimè hominem laboriosum inter purpurascens offendes , nisi in aliis morbis perversa Medicina , aut vehemens ira accesserit. 10. Ac ultimo pono loco ; ex optima sanguinis guttâ , maximè malignam materiam , tanquam intestinum hostem oboriri posse , per solum motum intestinum , aut auctum nimium , aut sibi relictum.

## CAPUT IV.

### *Therapia Purpuræ Albæ.*

#### S. I.

**M**Orbo huic tractando Capite præcedente pro Regula Therapiæ ejus posuimus Methodum Naturæ , s. Medici interni , ideo quod illa cum Ratione maximè congruat , ac Experientia ex effectibus & eventibus hujus methodi rectè sibi constantis , æquè ac aliarum sinistrarum , desumpta , demonstrat , hanc optimam atque unicam esse Methodum , quâ etiam Ars meliorem nesciat. Ibi enim ostensum est , quas Indicationes ratio omni ex parte vera ac prudens sibi formare debeat ; i. e. quid secundum omnes Circumstantias fieri in hoc affectu debeat , quo modo , quo ordine , quibus mediis , ut causa Morbifica , s. Morbus superetur , ac feliciter exterminetur , ea vero omnia Naturam ipsam præstare , tanquam verum Medicum , ut Arti parum admodum aut nihil restet , quod directe agat , nisi errantem placide in viam reducat. Sufficiat igitur ipsi , hunc Magistrum suum quam proximè observare , vestigia pressè sequi , omnes ejus actiones attendere , ubi quid agere omnino vult , nihil contra illum agat ; quapropter & hinc discat , quam necessarium sit , nosse Naturam , ejus operationes , harum naturam , ordinem , modumque ; hicque valet Axioma illud : Ubi Physicus desinit , ibi Medicus incipit. Hoc sane certissi-



certissimum est, in hâc præsertim Materiâ, Artem ad rei summam nihil posse, & si quid tentet ultra, nedum contra hanc Methodum, semper impacturam esse, & experietur, quod ipsa non potest natura, se non effecturam.

### §. I I.

Natura vero quicquid in Oeconomia suâ potest, vel in potestate sua universa habet ad agendum, sunt Motus, horum directiones, atque modificationes; materiam ipsam corrigere haud valet, nec hoc in artis potestate, nec ea ejus est indolis, ut correctionis capax sit, sed citissimè ejici potius debeat, quam diu tolerari.

### §. I I I.

Cum parum igitur in hac re in potestate Medici sit, nec valeat Remedia directe contra hunc morbum suppeditare, sed Consilio magis, si usquam sanè, hîc magnam utilitateem afferre possit, dicemus in quo hoc consistat, ut nempe Regimen patientis dirigat, suadendo, quæ proficua secundum diætam, & quæ vitanda, demonstrando. Quo sane tantum hîc efficiet, quantum in aliis morbis, ubi medicamenta necessariaria sunt, atque utilia, eorum suppeditatione. Commendetur igitur tali Ægro, ut ante omnia evitet hypocaustra calida, sufficiet talis caloris gradus, ut modo ne frigeat; Aëris, si sudum non sit, liberi accessus arceatur, quia Tonica Sensatio in his sensibilissima, ejusque alteratio maxime periculosa est. Stragula non sint densa atque copiosa; Calor enim externus nimius, anxietates, inquietudines impatientes, commotiones sanguinis, deliria &c. parit, minimè confert ad elicienda exanthemata, aut sublevandum morbum.

### §. I V.

Inappetentia huic affectui non sine ratione familiaris sibi relinquatur, nec quid esculenti ultrò offeratur. Sitis ordinariè tolerabilis, sedetur, non tamen uno haustu oppletivo, nec frigide ingurgi-



gurgitando , quod non bene ferunt : Admoneatur æger , ut quam tranquillissime se gerat , nec impatienter corpus jactitet ; indusia ne per totum morbum mutantur , suaserim , imo durante Purpura , ac in superficie corporis apparente , ne lectus quidem sternatur.

§. V.

Methodus Positiva ejusmodi Febris occurrendi , quam graves Controversias & lites dederit Viris Medicis duarum Germaniæ Celeberrimarum Academiarum atque famigeratissimarum , Illustribus , admodum notum mihi est. Una Pars commendabat præ aliis omnibus remedia alexipharmaca , excitantia & Cardiaca ; nec hoc sine magna specie rationum : Observabant enim , pulsus in ejusmodi febribus lenissimum , nec multum à naturali differentem , Urinam itidem sanæ similem , nec quidquam vigoris internarum secretionum ; aut commotionum indicantem , nullam manifestam excretionem , arbitrabantur in ejusmodi Malignis Morbis pulsus debere esse fortem , celerem , excretiones expeditas , sudores copiosiores , ad hæc vero Febres has non inclinare per se , naturam hic ob causæ malignitatem languere ; hinc igitur putabant maximè Negotium dari Medico , eique incumbere , Naturam excitare , se- & excretiones stimulare , toti processui vigorem conciliare , aliàs rem non posse , quàm malè cedere ; Bona igitur intentione , naturam adjuvandam atque impellendam statuebant , adeo ut alteram Partem etiam apud externos , & vicinos malâ notâ inurere fusciperet.

§. VI.

Altera Pars eandem indolem ac symptomata harum Februm perspicuens , simul observabat , rationalem esse hunc processum febrilem , motusque materiæ morbificæ proportionatos & congruos , quippe quæ per fortiores commotiones retineretur , magis quam ut per diaphnœm ( quæ placidos humorum appulsus , ac motitationes ad peripheriam corporis requirit ) expellatur. Porro animadvertens , plures Patientes non modo melius se habere ab omnibus



artificiis abstinentes , sed facilius quoque ad pristinum redire statum, quam illos , qui Methodo pellente , aut sudores protrudente uterentur, qui non tantum plura & graviora symptomata ferrent , sed multo majorem horum numerum succumbere , potius inquam hîc omnia contraria statuebat ac temperatiora omnia , imò temperantia suadebat , cui experientia , & quilibet observandi atque concludendi compos adstipulantur ; Cui & ego , non ex Autoritate aliorum , aut cæcâ credulitate , vel ex Traditione doctrinali facili applausu recepta , sed multiplici , copiosâ , & sollicita Conversatione Clinica cum ejusmodi Ægrotis , & hâc methodo toties apud illos adhibitâ , convictus , manum do , eamque nunc , qualem semper habuimus , traditum eo.

## S. VII.

Hic igitur repeto , unicam Viam , per quam corpus iterum liberari debeat , ac tutò possit , esse Diapnoën , & hanc motibus placidis , tranquillis , continuis tamen sine tumultu procedere , Methodumque artificialem cum spontaneâ eandem esse debere , & contra hanc , tanquam Normam nihil agendum. Consistit , itaque in executione sequentium indicationum , quibus singulis sua opposita subnectam. 1. In conservatione Directionis motuum se- & excretoriorum versus corporis peripheriam ; quò Materia morbifica semper ab internis arceatur , in extremo enim hoc Emunctorio latius dissipari ac distineri potest , ne unitâ Vi agere queat , & locus est , ubi Materia consistentiæ halituosæ aptissimè ac commodissimè exhalare potest, 2<sup>dò</sup>. ut fiat assiduò , sed moderatè admodum , intra brevem ambitum , sed non præcipiti cum impetu. 3. ut accuratè observentur opportunitates agendi , ac momenta critica , illa suis actionibus servando , eaque sectando , aut 4. sub horum ambitu nihil alieni agendo , sique motus non excedant , sibi potius relinquendo ; Critica per se sunt delicata , in hoc autem morbo præ aliis spinosa , priusque suspectum habeas excessum motuum , quam timeas horum defectum. 5. Adhuc magis cavendum , ne ante opportunitates , & extra has , tales commotiones seu



feu directiones tententur, alias certissima noxa, si non periculum sequetur, etsi ad ea loca fiant & eâ specie, quæ de cetero utilis esse possit, ubi cum nocumento doceri potes, quamvis idem facias quod Natura, tamen nec idem, nec ejusdem effectûs, sed potius contrarii esse; est hic quoque ubi Empiricum à Medico rationali distinguere poteris, 6<sup>to</sup>. Non minori prudentia & circumspeditione prævidendum est, ne tales commotiones præposterè suscipiantur, quò Natura placidis tantum adminiculis adjuta, aut plane sibi relicta jam quasi deferbuit, ne ad ferociiores commotiones iterum per talia stimuletur, nec nisi morte ipsa erroneos & exacerbatos motus suos pertinaces finiat.

### §. VIII.

Nunc brevissimis, quid hic contra Naturam *ἡ ἀμεθοδῶς*, & quomodo offendi possit, monstrabo. 1. Quando Materiae hujus Morbi halitûs consistentiæ, & tenuiter latèque per sanguinem dispersæ, crassis commotionibus & evacuationibus, unâ & simul per particulares vias, ac ubi peculiari directione opus est, eliminatio intenditur, ut si huic scopo satisfaciendo putatur hoc unâ vice & simul fieri posse per Emesin ab initio Morbi concitatam, aut, si interdum contingit videre in hoc affectu Diarrhoeas, ibi minimè sequendus canon ille; Natura, quò vergit, ducenda, quamvis quidem alvum liberam esse, bonum sit, non tamen oportet valde curare adstrictionem ejus paucorum dierum, multo minus laxantibus rem aggredi, minima hîc irritatio magni quid inferre potest, & solet; Omnia loca, præter Peripheriam Corporis, per quæcunque Materiam ducere velis, sunt alienissima. Ad Methodos *ἀλλότριας* & vias particulares omni jure accenseri meretur Ventilatio sanguinis per evacuationes artificiales, quarum utilitas, nedum necessitas nullis rationibus probari, nec experientia confirmari possunt, ex utroque verò capite contrarium satis ac solidè evinci potest, quod verò hic mei instituti non est, prolixè deducere, cum id jam fecerit Celeberrimus Halensium Professor, ac Illustris Medicinæ Restaurator, Stahlius, propria Dissertatione Anno 1703. habitâ.

### §. IX.



§. IX.

Porro ad Methodos artificiales à spontanea alienas, imo huic planè contrarias pertinet artis vitium ( seu Artificium ) eorum, qui in febribus acutis malignis sibi ipsi symptomata urgentia ( quæ ipsi sæpius per abusum alexipharmacorum & volatilium etc. talia reddidère ) formantes, ad opium famosum confugiunt, si nempe deliria valde Magna, inquietudines, noctes vigiles, internorum motuum exacerbationes, seu potius ( bene si sic respicerentur ) motus eluctatorios, angustias pectoris, patientis ipsius & adstantium vident & audiunt, ad parvum tantum tempus sublevationem petentes, tunc inquam emolliti quasi ac commiseratione intempestiva tacti, hæc symptomata pro Morbi Vi, & urgente indicatione habent, aliquot tantum doses sacræ hujus anchoræ concedunt, quam longè autem hæc à vero motuum scopo, per se salutarium, aberrant, quique circa critica momenta plerumque se ostendunt, nunc mihi non sumo uberius deducendum; id autem quasi in formâ Quæstionum peritè & circumspectè Practicantibus propono. 1. An in Febribus Malignis unquam ullo modo Opiata necessaria esse possint, seu, an, & quæ vera sint illa symptomata urgentia, taliaque flagitantia? 2. An ingenuè & sine fuco unquam in his utilia? 3. An solum tuta sint? annon certissimas noxas habeant pedissequas, qualesque, an leviores, aut graviores? Sæpius quidem citissimè motus atque dolores sistunt, nec tamen id semper, potius stupores, deliria vehementiora, angustiae atque anxietates internæ, Coma, Lethargus, tonus vagus, & ex hoc sudores frigidi, ac tandem placidissima quies perfecta & æterna subsequuntur.

§. X.

Plerumque versus Dies Criticos, ubi de summa rei omnibus certatur viribus, symptomata exacerbantur, quid enim Naturæ instrumenta & arma sunt, quam soli motus? & ex his contra Morbosam Materiam pugnantibus, & sensum dolorificum, alienationes animi,



animi, & similia excitantibus consistunt Symptomata illa gravia: Si igitur hos non pro salutaribus habeas, sed potius contra hos pugnes, Tu & Materia activitatis celerrimæ & pessimæ brevi tradetis Acheronti ægrum. Talia ideo quoque rejicimus, quod securius, ac ejusdem celeritatis Remedium habemus, ad Motus, si omnino nimii videantur, temperandos, & quidem longè certius & specificum quasi; nec ubi etiam talibus medicamentis opus esse videri posset, haud facile aliud præter hoc impunè propinabitur. His præmonitis, re-præsentabimus nobis eas, quas formavimus indicationes, simul autem, quid ibidem de spontanea Naturæ methodo diximus; Cumque omnes in eo convenient indicationes, quod summa rei, placidâ, sed assiduâ, & continuâ excretionem diaphoreticâ absolvatur; hinc in Purpurâ simplice ante eruptionem exanthematum Patienti exhibeatur ter circiter de die  $\text{℥ss}$  temperans & absorbens ex Ocul. Cancr. + sitate Citri ad plenariam amissionem omnis saporis, saturat. aut Conchis tali modo præparatis (quod medicamentum insignem vim alterandi habet, ac præprimis, quibus pectus non admodum liberum, sed oppletionem aut tussi vexatum, conducit) absorbente simplici, & portione  $\text{℞i}$ , ita ut singulæ doses  $\text{℞i}$  grana 5. habeant ad minimum, cui pro re nata addi poterit Antimon. diaphor.

## §. XI.

Ubi jam Purpura incipit provenire, ibi quiescendum, sique placide procedat, planè abstinendum ab Artificiis; si verò proruperit, lenissimo regimine diaphoretico, & alexipharmacis temperatissimis promoveatur, isque observetur ordo, ut matutino tempore, quo paroxysmus plerumque aliquanto lenior, propinentur Essent. Scord. gutt. 15. ad 20. in potu ordinario; per diem vero continuantur pulver. absorbentes. In statu verò composito, quicumque Morbus ei sit sociatus, cautius procedendum, imprimis si sit acutus, magisque si simul Malignus, ibi enim tot occurrunt difficultates, ut verè hic, ubi regulæ medendi essent tradendæ, dicere debeam: Multa sunt, quæ nec dici, nec scribi possunt.



Sumam mihi unum tantum horum, cui Purpura se facillime complicat, ne Dissertationis limites excedam. Si proveniat cum Petechiis, aut his nondum superatis superveniat, ut ita 2. Morbi Maligni gravissimi convenient, ibi sanè in male fidâ statione Purpuræ, Morbo in longius se trahente variis cum mutationibus se subindè intra breve intervallum excipientibus, metu retrocessionis, vehementibus deliriis, summis anxietatibus, aut motibus, mox languentibus, mox excedentibus, omnino Medico vigilandum est, firmoque animo, solidâ ac tutâ Methodo ipsi prospiciendum, quò conscientia sana fervetur magis coram Deo, quam hominibus, ita tamen, ut his quoque rationem actionum suarum reddere queat, nec animum suum in tempeſtiva Miſericordiâ emolliri patiatur, ut ad incerta & ambigua remedia confugiat, ſicuti hic lubrica occasio eſt, aut ad opiata, aut calida alexipharmaca. Dabo Conſilium, quod ego ſemper obſervavi. Motus ſi videantur excedentes ( quod tamen in re tam ſeria bene explorandum ) peritè ac dextrè adhibeatur illud, de quo in ſuperioribus mentio facta eſt, remedium tutius & certius, quam ullum aliud; eſt vero illud  $\textcircled{\text{O}}$ rum largius ſed repetitis doſibus datum ad exquiſitum ſenſum Saporis in lingua perceptibilem, ita tamen ut ne excedat, cui ego Caſcarillam addere ſum ſolitus; inveniet artiſcioſus Medicus in hoc remedio, quod plurimi non putabunt inexperiti. Ob languentes Naturæ motus, ſi retroceſſio timeatur, adhibeantur bona cardiaca ac confortantia ( quorum admodum pauca ſunt ) non tamen valdè aromatica. Cominendant ſe vere per ſe  $\text{+}$ dum Litri, quod apud patientes eo modo adhibui. Juſſi per diem 1. ad 2. mala Citrea recentia cum corticibus in orbiculos dividere, ſaccharo non parcè conſpergere, qui hîc non timendus, & pro lubitu comedere, vidique non ſolum ſitim ſub ejus uſu tolerabilem eſſe, ſed patienti gratum Medicamentum, magisque recreans, quam multa alia ſub titulo confortantium nota; ubi noto, per totum morbi decurſum ſine ullo timore hæc uſurpari poſſe,  $\text{+}$ da admodum hîc quadrant, non Mineralia tantum congrua, ſed Vegetabilia; cum his conjunges juxta  $\text{+}$  ſupra dictos frequentiores doſes eſſent. ſcordii; acriora ſi ſumas, cave ne nimis fiat.



§. XIII.

Multi admirabuntur paucitatem medicamentorum, dixerintque forsan, rem brevioribus ambagibus potuisse expediri. His respondeo, me facillimè maximum cumulum alexipharmacorum & roborantium potuisse recensere, —um C.C.,  $\Theta$ le viperarum, Camphoram, Myrrh. Croc. Copia essentiarum ex Regno vegetabili &c. Libri enim Medicorum talibus non carent, ex his exscribere totus labor fuisset. Ad 2<sup>dum</sup> responsionis loco monebo, eam esse faciem Medicinæ Practicæ, ut, quid evitandum sit docere, hîc certo sensu majus involvat emolumentum ac momentum, quam positivè medicamenta præscribere; porro dehortor, ne in his anxiiis rebus variabilis sit Medicus, ac uno medicamine non statim ad sensum opem ferente, ad alia subinde progrediatur, ita enim Naturam confundet, ut ad mortem usque ex turbis se non expeditura sit, non adhibeat incerta, ambigua, inexperta remedia, quibus periculum facere velit, & secundum Germanorum phrasiologiam: In diesen Umständen muß man alles probieren. Imprimis, cum uti supra dictum, hujus morbi indoles, in morbis præcipuè complicatis, adeo sit subdola, ut patientes sæpe in optabili atque optimâ euphoria ad faciem constituti subitò ac brevissimis moriantur, vid. Cap. II. §. 18.

§. XIV.

Pauca hic habes Medicamenta, sed bona atque tuta, quibus NB. opportunitates sequendo, longè majora efficies, quam quibusvis aliis. Scordium non sine causa commendavi, se ipsum enim multis Practicis commendavit in Febribus malignis, contagiosis, pestilentialibus, ac in genere in corruptione humorum putrida, tanquam egregium balsamicum internum, atque alexipharmacum temperatum, certum tamen & securum, cui si omninò aliquid jungere velis, præ aliis commendarem essentiam cascariillæ, sed parcius.



§. X V.

Commodè, in sensibilibus præsertim, interpones pulveribus supra nominatis, aut eorum loco adhibebis, Potiunculas diapnoicas ex aquis e. g. Scord. Card. b. flor. acac. samb. C. C. Citrat. Scorz. chærefol. plantag. scabios. &c. quibus junges Syrup. papav. rh. aliumve, & admiscere poteris Æs dictos, variationis gratia. Camphora omnium minime placet, celerrimæ & impetuosæ commotionis, quamvis eam sub  $\bigcirc$ ro occultaveris, non magis & Myrrha, quæ in externis id præstat, quod scordium in Morbis internis. Quid amuletum Celeberrimi Domini Wedelii in hoc Morbo possit, Experientiæ relinquo, mihi id experiri non licuit.

C A P U T V.

*Observationes & Cautela.*

I.

**P**urpura alba æquè ac rubra ab aliquot tantum Iustis in quibusdam locis Saxoniae ita notas se reddidere, ac Alba præcipuè Halæ Magdeburgicæ coepit epidemicè grassari.

2. Purpura alba ab Anno 1652. in his Regionibus commune Puerperarum symptoma deprehensa est, nunc verò etiam extra Saxoniam puerperas infestare observatur.

3. Datur quoque Purpura alba benigna, in infantibus ab aliquot hebdomadis natis, sed incongruè sic dicta, siquidem albæ tantum pustulæ sunt, facile iterum evanescentes, quæ totam cutim secum detrahunt, & infantibus antea nigris albam cutem conciliant.



4. A peritissimo atque expertissimo Medico quodam asseritur, pustulas albas in Purpura non semper prorumpere, ac feliciter & infeliciter sine his interdum decurrere posse ac solere, atque ideo pustulas has non esse huic Morbo essentielles, cui ego nec assensum præbere possum, nec plenum dissensum.

5. Purpura complicata diebus criticis, vel criticodeis, aliis Morbis accedere amat, uti 4<sup>to</sup>, 7. 11. 14<sup>to</sup>; hinc in Morbis acutis Medico caute procedendum & hæc timenda; præsertim quando duriora videntur Morbi primarii symptomata, quod & Medico perito faciem ad prognosin præferre potest.

6. Notum mihi est exemplum Studiosi cujusdam, qui Purpurâ decumbens cum Petechiis complicatâ, morboque in 4tam hebdomadem tracto, ipsoque vix mortem evadente, Gonorrhœâ, quâ laborabat, virulentâ cum hoc Morbo, liberatus est, quod mihi Occasionem præbet

7. Observationis loco recensere, quod inter subjecta Purpuræ obnoxia sint Milites magnæ hodierni Seculi Deæ, Veneris, quibus planè superata Purpurâ, purgans Særiale utiliter propinatur, ne quid in lymphâ aut sero residui relinquatur, quod verò non minus & aliis Purpura afflictis conducit.

8. Nonnunquam Purpura Bubones producit, cujus exemplum est Studiosus quidam Medicinæ, cui in collo die critico valde Magnus subortus est, qui diu satis duravit sub valde ambiguo Morbi statu.

9. Diarrhoea huic Morbo si accedat, ☉rum cum momento Cascarillæ, sed non longioris continuationis se commendat.

10. Urina & Pulsus in Purpurâ incerti ac fallacis sunt indicii.

11. Cum Catarrhis complicatæ, si Aphthæ superveniant, Effent. Pimpinell. alb. gutt. X. ad XV. sine vehiculo interdum pro gargarizando adhibitæ opem ferunt.

12. Dolendum est, Specifica contra tales Materias malignas tot specierum adhuc ignorari, atque deficere.



13. Hæmorrhagiis, præsertim si Criticis diebus se manifestent, directè occurrere non licet, sed sibi relinquendæ sunt, etsi nihil boni unquam ab illis exspectandum sit (solent enim plerumque largiores esse) Præter temperantium frequentiorum usum cum largiori Oro, parum securi remedii suadere licet. Illud autem dextrè peritis Medicis quæstionis ac Clausulæ loco proponere cupe-rem, quid agendum sit in subjectis Hypochondriacis, aut valde Plethoricis, quale exemplum supra enarravi Cap. II. §. 13. an V. sectio suadenda primo aut secundo die? an repetenda? cum hîc videamus, Naturam effudisse sanguinem cum anima. In Febre Catarrhali Malignâ feliciter hanc aliquoties cessisse, bis quoque repetitam, novi: annon hic aliquid tentandum, cum periculum sit tam præsens, si etiam jam à priori, ante factum sciri possit, sequuturas tales hæmorrhagias, ex inclinatione patientis ad has? ubi autem Diapnoica fortiora, aut Alexipharmaca temperata cum regimine subjungenda essent; aut an melius sit talem finire mori, quam aliquid tentare? Hujus autem Resolutionem libenter, ut dixi aliis relinquam, quamvis multæ rationes affirmativam suadere, multæ quoque, quod non nego, dissuadere videantur.

F I N I S.



CORO-





# COROLLARIA.

1. *Febris non est Morbus.*
2. *Foetus in Utero struitur, nutritur, conservatur ab Ente spirituali, intelligente, rationali.*
3. *Spiritus agit in Materiam immediatè, imò pondus aliquot Centum librarum in altum tollere potest.*
4. *Remedia Martialia non agunt in Massam Humorum.*
5. *Sensus non fiunt mechanicè, sed organicè, i. e. posuñt Machina s. Organo alicujus Sensûs in id agente, sensus tamen ideo non excitatur necessariò.*
6. *Podagra non est Morbus s. vitium Humorum, nec incurabilis est.*
7. *Nervi Materni generantur à pathematibus animi, tanquam causa efficiente.*
8. *Lues Venerea non est contagiosa.*
9. *Malum Hypochondriacam sine motu Corporis, aut Hemorrhoidibus non solvitur.*
10. *Dantur omninò Spiritus Animales.*
11. *Mutatio Metallorum ignobiliorum in nobiliora non tantum possibi'is, sed vera datur, sique per volatilisationem circulatoriam, & fixationem.*



12. *In Corpus humanum non cadunt Passiones.*
13. *Non dantur Remedia purgantia , nec cardiaca.*
14. *Circulatio sanguinis ab Harveo non est inventa.*
15. ♀ ♂ Oratum in Atanâ longe certius & securius  
Chinâ est.
16. *Datur Aurum potabile , sed non medicinale.*









